

Headlines

- 1 कुलगाम दे कुज्जर इलाके च टाकरे दरान सुरक्षाबलें दऊं आतंकवादिएं गी मारी मकाया। राजौरी दे कालाकोट च सुरक्षाबलें आस्सेआ चलाया गेदा तपाशी अभियान बरोबर जारी ऐ।
- 2 राज्य जांच एजेंसी नै नारको आतंकवाद आले मामले दे सरबंधै च पुंछ च त्रै थाहें पर छापे मारे न।
- 3 लेफ्टिनेंट गवर्नर मनोज सिन्हा होरें आखेआ ऐ जे अस जम्मू-कश्मीर दी सांस्कृतिक पंछान ते आध्यात्मिक परंपराएं गी परतियै बढावा दित्ते जाने दे गवाह बनै करने आं जिनें सदा मनुक्खता, साम्प्रदायिक संबोध ते विश्व शांति गी बढावा दित्ता ऐ।
- 4 जम्मू तवी गोल्फ कोर्स च जे एंड के ओपन गोल्फ टूर्नामेंट दा त्रीया संस्करण शुरू, चऊं ध्याडें दी इस प्रतियोगिता च अंतरराष्ट्री ते राश्ट्री स्तर दे 114 खड्दारी हिस्सा लै करदे न।

<><><><><><>

Encounter

कुलगाम जिले दे कुज्जर इलाके च सुरक्षाबलें ते आतंकवादिएं बश्कार होए दे टाकरे च 2 आतंकवादी मारे गे न। रिपोर्ट मुजब इलाके च आतंकवादिएं दी मौजूदगी बारै थहोई दी टकोहदी जानकारी पर कार्रवाई करदे होई सुरक्षाबलें इलाके च तपाशी अभियान चलाया। एह टाकरा उसलै शुरू होआ जिसलै आतंकवादिएं सुरक्षाबलें पर गोलियां चलाना शुरू करी दित्ता जेदा सुरक्षाबलें आस्सेआ परता दित्ता गेआ। इसै दौरान होई दी गोलीबारी च दो आतंकवादी मारे गए। इलाके च तपाशी अभियान जारी ऐ। होर ब्यारे गी बलगेआ जा'रदा ऐ।

Rajouri-Search

राजौरी दे कालाकोट इलाके च सुरक्षाबलें आस्सेआ चलाया गेदा तपाशी अभियान जारी ऐ। भारती सेना ते जम्मू-कश्मीर पुलस नै कालाकोट इलाके च किश बे-पंछानू लोके दे दिक्खे जाने बारै थहोई दी टकोहदी जानकारी मगरा सांझे तौर पर तपाशी अभियान चलाया गेआ।

<><><><><><>

SIA-Raids

राज्य जांच एजेंसी नै नारको आतंकवाद दे मामले च अज्ज बन्ने आले जिले पुंछ च त्रै थाहें पर छापे मारे न। जिले दे करनाह इलाके एह छापेमारी कीती गई ऐ। पुलसै मुजब नशीले पदार्थे दी तस्करी दे सरबंधै च मोहम्मद इकबाल, मोहम्मद लियाकत ते सफदर हुसैन दे घरें च एह छापे मारे गे न। एह मामला ओकडे बदनाम तस्करें कन्नै सरबंधत ऐ जिनेंगी भारती फौजै कब्जा रेखा पर घुसपैठ करदे होई गिरफ्तार कीता हा। पुलसै मुजब एसआईए दी टीमै अज्ज पुंछ दे करनाह इलाके च इनें त्रोनें आरोपिएं गी गिरफ्तार करने दे मकसद कन्नै छापेमारी कीती ही पर इंदे चा कोई बी घरै पर नेई लब्बा। एसआईए दी टीम नै उन्दे घरें दी तलाशी लैती ते किश इलेक्ट्रनिक उपकरण बरामद कीते।

<><><><><><>

LG-JK

लेफ्टिनेंट गवर्नर मनोज सिन्हा होरें श्रीनगर दे शिवपुरा च अज्ज जगतगुरु श्री रामानुजाचार्य सरस्वती भंडरम डिजिटल लाइब्रेरी ते श्री यदुगिरी यथीराजा मुट्ट शाख दा उद्घाटन कीता। अपने संबोधन च एलजी होरें जगतगुरु श्री रामानुजाचार्य हुंदे आस्सेआ समाज लेई दित्ते गेदे योगदान गी चेता कीता। उनें जम्मू कश्मीर दी परानी शान बहाल करने लेई प्रदेश दी सरकार दे धेइयै गी बी सांझा कीता। सिन्हा होरें आखेआ जे जम्मू-कश्मीर दी सांस्कृतिक पंछान ते आध्यात्मिक परंपराएं म्हेशां सब्बनें धर्मे ते मनुक्खता दे अस्तित्व गी बढावा दित्ता ऐ। सिन्हा होरें गलाया जे गृह मंत्री अमित शाह होरें इस मौके पर अपनियां शुभकामनां दित्तियां न ते जकीन दोआया जे ओहू तौले गै इस शाख दा दौरा करडन।

CRPF-Jammu

केंद्री रिजर्व पुलस बल सी.आर.पी.एफ दा महिला मोटर सैकल अभियान 2023 अज्ज जम्मू पुज्जा। कमांडेंट तारिक हुसैन खान हुंदी अगुवाई च सी.आर.पी.एफ आस्सेआ अज्ज जम्मू च सुआगत समारोह दा आयोजन कीता गेआ। महिला शक्ति ते एकता दा संदेश फैलांदे होई इस महिला मोटर सैकल अभियान नै अपनी जात्तरा लाल चौक श्रीनगर थमां शुरू कीती ते एहू जम्मू, अमृतसर, जलंधर, पिन्जौर, सोनीपत, गुरुग्राम, जयपुर, अजमेर, उदयपुर, गांधी नगर ते बड़ौदा थमां हुंदे होई 2 ज्हार 134 किलोमीटर दा सफर तय करियै एकतानगर गुजरात पुज्जियै सम्पन्न होई जाग।

CRPF-Women

एह्दे शा पैहले यशस्विनी नांड दा एहू महिला सी.आर.पी.एफ मोटर सैकल अभियान उधमपुर पुज्जा जित्थे 137 बटालियन दे कमांडेंट रमेश कुमार ते डीडीसी उधमपुर लाल चंद होरें एह्दा सुआगत कीता। इस मौके पर होर केई अफसर ते बक्ख-बक्ख सरकारी स्कूलें थमां आए दे बच्चे उत्थे मज्द हे। सीआरपीएफ दिएं महिला कर्मिं दे बैंड आस्सेआ इस मौके पर रंगारंग प्रस्तुति बी दित्ती गेई। उधमपुर दे जखैनी पार्क थमां इनें महिला मोटर सैकल सोआरें गी उत्थुआं अगो बरधाई दित्ता गेआ। इ'नेंगी एलजी मनोज सिन्हा होरें कल लाल चौक थमां रवाना करोआया हा।

<><><><><><>

AIR-Hindi

आकाशवाणी जम्मू दे परिसर च अज्ज हिंदी माह दे समापन समारोह दा आयोजन कीता गेआ जेदे च आकाशवाणी ते दूरदर्शन जम्मू दे अधिकारिं कर्मचारिं ते होरनें बी हिस्सा लैता। समारोह दी सदरत आकाशवाणी ते दूरदर्शन जम्मू दे कलस्टर प्रमुख डीडीजी (इंजीनियरिंग) जे रविकांता बाबू होरें कीती। इस मौके पर हिंदी माह दरान करोआई गेदी बक्ख-बक्ख प्रतियोगिताएं दे जेत्तुएं गी सम्मानित कीता गेआ। एह्दे अलावा मौके पर गै सोआल-जोआब प्रतियोगिता दा बी सरिस्ता कीता गेआ।

<><><><><><>

Advisor-Jk

उपराज्यपाल हुंदे सलाहकार आर.आर भटनागर होरें आखेआ ऐ जे जम्मू-कश्मीर बदला रदा ऐ ते अजें तगर इस बरे तकरीबन इक करोड़ 60 लक्ख सैलानिं जम्मू-कश्मीर दी सैर कीती ऐ। जम्मू च आयोजित कार्यक्रम दे बाहरें आकाशवाणी समाचार कन्नै गल्ल करदे होई उनें आखेआ जे एहू जम्मू-कश्मीर च नमा बदलाव ऐ जित्थे शांति, विकास, प्रगति होआ र'दी ऐ। उनें गलाया....

Golf-Tournament

जम्मू-कश्मीर ओपन गोल्फ प्रतियोगिता दा त्रिया संस्करण शुरू होआ। एदा सरिस्ता सैलसफा मैहकमे आस्सेआ प्रोफेशनल गोल्फ टूर ऑफ इंडिया दे सहयोग कन्नै जम्मू तवी गोल्फ कोर्स च कीता ऐ। 4 दिन दी एहू प्रतियोगिता अज्ज थवां शुरू होई ते एदा उद्घाटन उपराज्यपाल हुंदे सलाहकार आर.आर भटनागर होरें कीता। 114 खडारिं चा 109 पेशेवर खडारी इस प्रतियोगिता च हिस्सा लै रदे ना। इन्दे च अंतरराष्ट्री खडारी जियां कैनेडा दे सुखराज गिल, बंगलादेश दे बादल हुसैन ते नेपाल थवां सुकरा बहादुर शामिल ना। भारत थवां ओम प्रकाश चौहान, अमन राज, अक्षय शर्मा ते होर दुए खडारी हिस्सा लै रदेना। सैलसफा सचिव सैयद आबिद राशिद शाह होरें आखेआ जे गोल्फ सैलसफा गी बढावा देने लेई महत्वै आली भूमिका निभा रदा ऐ। उनें आखेआ जे इस दौरान डोगरा संस्कृति गी दस्सेआ जाग ते डोगरा खाना बी परोसेआ जाग। इस दौरान जी-आई टैग हासिल बसोहली शॉल दस्से जाडन। आर.एस.पुरा दे बासमती चौल बगैरा बी शामिल न, बी परोसे जाडन।

<><><><><><>

Ayushman Bhav

जम्मू दे सेहत सेवाएं, सरबन्धी निदेशालय आस्सेआ आयुष्मान भव: अभियान तैहत जम्मू खित्ते दे सेहत इदारें च आम लोकें तगर पुज्ज बनाने सरबन्धी केई सारी सार्वजनिक आउटरीच गतिविधिं दा सरिस्ता कीता गेआ। एहू सब्बनें गी सेहत सुविधाएं दे दायरे हेठ आहनने दी दिशा च पुट्टी गेदी बड़ी महत्वपूर्ण गैहू ऐ। जम्मू खित्ते च सब्बनें जिलें आस्सेआ सेहत ते आरोग्य केंद्रें ते

सामुदायिक सेहत केंद्रें ते सामुदायिक सेहत केंद्रें च आयुश्मान सेहत मेलें दा सरिस्ता कीता जा करदा ऐ ते उत्थे लोकें गी आभा कार्ड, एनीमिया दी जांच, रक्तदान शिविर, आयुश्मान भारत योजना दे फायदें, टी.बी मुक्त पंचैत, टेलीफोन राएं डाक्टरी सलाह, मते व्यापक मिशन इंद्रधनुष ते होरनें सेहत योजनाएं दे लाहू उपलब्ध करोआए जंदे न। भारत सरकार दी राष्ट्रव्यापी सेहत पैहलकदमी आयुश्मान भवः अभियान दा मकसद देशै दे सब्बनें ग्राएं कस्बें तगर म्यारी सेहत सेवाएं दी दस्तयाबी जकीनी बनाना ऐ।

<><><><><><>

Poonch-Health Mela

पुंछ दे डिप्टी कमिशनर यासिन एम. चौधरी होरें अज्ज मनकोट च आयुश्मान भारत सेहत ते आरोग्य केंद्र च संकल्प सप्ताह प्रोग्राम दे हिस्से दे तौर पर आयुश्मान भवः सेहत मेले दा उद्घाटन कीता। हफ्ते भर चलने आले इस अभियान दौरान सेहत सरबंधी गतिविधिएं पर ध्यान दिता जाग। इस दौरान खित्ते च रौहने आले लोकें दी सेहत ते उन्दी बेहतरी गी यकीनी करने बारै कम्म-कार्रवाई कीती जाग।

Poonch-MMMD

पुंछ ब्लाक च अज्ज 'मेरी माटी मेरा देश' अभियान दा दुआ गेड़ शुरू होआ। इस प्रोग्राम दा सरिस्ता ग्रामीण विकास विभाग नै नेहरू युवा केंद्र ते एन.जेड.सी.सी.पी दे सहयोग कन्नै कीता। इस अभियान दा मकसद मुख्य भरै दे हर घर तगर इस अभियान गी पजाना ऐ। ग्रामीण ते शैहरी इलाके थवां 6 लकख थवां बद्द गाएं शा मिट्टी ते अन्न-दाने किट्टे कीते जा रदे न। ग्रामीण इलाके च ब्लाक सतह पर कलश त्यार कीते जाडन।

Drugs Awareness

साम्बा जिले दी रामगढ़ तहसील च बन्ने दे नेड़े स्थित सरकारी हायर सेकेंडरी स्कूल च जम्मू-कश्मीर पुलस आस्सेआ सिविक एक्शन प्रोग्राम आयोजित नशा रोधी जागरूकता कार्यक्रम च 8 सरकारी स्कूलें हिस्सा लैता। कार्यक्रम दौरान विद्यार्थिं नशे दी कवैतू बारै अपने विचार सांझे कीते। साम्बा दे एसएसपी बेनाम तोष, एडिशनल एस.पी सुरिंद्र चौधरी, बीडीसी प्रधान ते स्कूल दे प्रिंसीपल होरें इस मौके सर्टिफिकेट ते नकद पुरस्कार भेंट कीते।

Kishtwar-ICDS

संगठित बाल विकास सेवाएं दी अमलावरी दा आंकलन करने लेई पोषण अधिकारी जिला प्रोग्राम अफसर डाक्टर रिशी कुमार शर्मा होरें इक व्यापक बैठक लाई। इस बैठक च सारे बाल विकास प्रोजेक्ट अफसर ते सुपरवाइजर्स शामिल होए। बैठक दौरान मुख करी चर्चा बच्चें दे पोषण ते मानसिक सेहत पर होई।

<><><><><><>